

四庫全書

集部

欽定四庫全書

集部

清容居士集卷十三

詳校官庶吉士臣張溥

侍讀臣孫球覆勘

總校官降調編修臣倉聖脉

校對官待詔臣胡士震

謄錄監生臣丁成鍾

欽定四庫全書

清容居士集卷十三

絕句

七言

團扇圖

玉樹秋殘翠影疎  
掩門何處望金輿  
朝陽殿裏渾閒事  
最恨當年李婕妤

擊梧圖

元  
袁桷  
撰

萬樹梨園已失春秋聲  
颯颯起胡塵  
君王獨立梧桐下  
不見當年鎖諫人

韓幹五王出游圖

花萼樓高怯翠衾  
平明聯騎走芳林  
讓皇可是無忠益  
一曲涼州恨最深

夜讀唐將遺事二首

合江雨暗裂珠旗  
鼙鼓驚驚怒促圍  
不是帝鄉車上去  
元戎那得袞衣歸

雉尾雲深漢殿開將軍鐵馬響春雷太平未覩匆匆去  
空憶君王白玉盃

秋山圖

簇簇麻姑十二闌倚空搖落總塵寰臥遊京洛誰消得  
一榻松風響珮環

童時侍先人泊京口旅樓一月正對江山樓繁  
麗特甚江津流民散處不可悉數今皆不復有  
追憶舊事因成絕句十首

碧瓦參差第一樓  
風旗獵獵喚行舟  
兵厨有酒真堪飲  
不學弓刀也白頭

紅袖娟娟舞旋齊  
鑿江一曲唱尤奇  
西湖院落曾翻得  
未識君王知不知

燈火闌珊月色低  
少年乘醉馬東西  
樓頭畫角聲悲壯  
又聽歌聲促曉雞

白草蕭疎野火焚  
流民草舍各星分  
沙田土瘦新耕得  
寧死江頭不作軍

朱門高插相風旗千里船行總得知  
稻米流脂江上去  
健軍何處是男兒

日日樓頭笑酒錢  
綈冠太守號籌邊  
鳴騶傳入丹陽館  
為是行都過客船

淮馬低如果下騶  
春風小隊打紅毬  
日斜臺上人爭看  
銀盃分明第一籌

明月曾愁多景樓  
幅巾長袖是清流  
金焦山勢元相望

不揜諸公富貴羞

劉改之舊有山掩  
諸公富貴羞之句

硯山園下將軍宅脫却兜鍪強學儒聞說高堂擁紅粉  
醉翻筆陣墨模糊

白雲一去愁千疊此地重來百不如空憶當年覓梨棗

小樓燈火了殘書

先人課子最嚴時  
在旅樓不廢講誦

雪中招虞伯生祝丹陽

空林一色十分春羞殺高眠獨笑人喚取東坊虞博士

紅爐同點奪胎銀

金芽初熟白皚皚袖手爐邊未盡開為請招真老高士



且須騎馬抱琴來

梁山灤

千頃芙蕖送我船  
碧香紅影亂娟娟  
梁山風景能消得  
不到西湖却十年

支家口

蕩底天鵝雜榜聲  
南鄉今有幾長亭  
錢湖未盡滄洲興  
臥看荷花十二汀

黃河

乘槎使者問河源織女相逢事惘然從此競傳天上去  
不知滄海幾桑田

耿山

一簇山腰總賣薪語音猶是舊吳人江湖水濶從今住  
更肯輕生學買臣

古黃河口

溫溫河水侶湯泉送我南歸意萬千入海定從天上去  
不知重會是何年

黃樓

詩到徐州不用題  
危濤千尺壓金堤  
羣峰翠盡蘇仙去  
萬古黃流日又西

伏日度淮

伏日陰陰盪棹船  
詩腸冰雪碧淮鮮  
黃塵自是人間暑  
不識薰風在五絃

過高郵

一片歸雲一片帆  
芰荷深處綠蒲灣  
鷓鴣可是無情思

不及沙鷗自在閒

甓社湖

甓社湖中新水清風牽荇帶引帆行雲妃夜度霓裳冷  
輕折菱花翫月明

聞見

飛蝗眼見度淮鄉又聽吳田水渺茫總怨春來雪五尺  
變風變雨變年荒

渡楊子江

一舸中冷煙雨飄片帆閃閃浪招招倚闌僧在半空語  
南去北來今幾潮

俞允遠治余別墅口占奉謝

種竹澆花俟我還花成雲塢竹成山相逢且說相思恨  
更說何時得共閒

周子敬三年不寄一書口占奉寄

伏日松陰酒一壺抱琴身與鶴身癯故人天外慵傳信  
唯憶楞伽是舊書

聞仲正新得掌珠道中奉寄

知君已厭添丁事與我同看納甲書  
別後匡牀清夢少春來又獲掌中珠

懷應得茂

瘦石支筇偈仄吟吳山雲冷越雲深  
江湖老盡誰知己獨聽寒泉響玉琴

明皇醉歸圖

日暮毬場醉欲歸停鞭更進紫霞杯  
老髯未省霖鈴曲

猶願君王款款回

過故人墓

湖曲深深鎖墓田  
種松成本起蒼煙  
欲窮精爽周流處  
雲在青山月在天

送昌上人

江南山水一枝藤  
更上雲中第五層  
昨夜西風傳雁信  
露華如雪月如冰

方袍圓帽眼如鶩  
問訊紅衣不點頭  
剛道西天同佛住

瑩篴琴瑟勝南州

題葛仙翁移居圖

翁媼相攜入翠微  
轉頭猶有可憐兒  
丹砂不是神仙藥  
勾漏歸來鬢已絲

黃松瀑索酒

殘春聽雨元無著  
恰侶槽床淺滴聲  
活水飛花誰駐得  
願隨小榼夜深傾

祝丹陽飲馬圖



天馬從來不受塵  
水清深愛自由身  
髯奴未識相忘處  
手控青絲強屈伸

舊春花下與東嘉  
周子敬聯詩有人到中年始  
憶家之句余坐舟中五十日因憶此詩作俳諧  
體奉寄

平生愛詩復愛酒  
晚歲畏名兼畏茶  
年過五十不歸去  
底用中年始憶家

四明衣冠山水窟  
人道風流勝永嘉  
爾來愁絕各閉戶

方信中年始憶家

我眠船中五十日飯有飛塵鬢有沙古言墨頭須萬里  
底用中年始憶家

春風一架爛金沙憶昨同醉遺烏紗山東禁酒不得飲  
方信中年始憶家

題鄭潜昭玉堂藁

雲漢天孫古錦機秋風槎上解相期迴鸞舞鳳曾翻得  
不用人間五綵絲

春睡牽人渴思濃小窗誰贈密雲龍自憐舌本那知許  
急寫緘題侶舊封

宮娥奕棋圖

爭先春色在眉端圍坐佳人著意看可是相憐饒不得  
東風自怯五更寒

求酒

為愛雲房酒盞清涓涓殘溜滴春聲夜來梅月十分白  
嗅盡梅花看月明

輕輕梅花春風面却似道人微醉時只恐花飛失君意  
更酌叵羅歌小詞

小詞歌徹飲叵羅一寸清霏奈客何窗外馬蹄猶不住  
誰道江南春水多

我家舊釀碧琉璃色壓花枝朶朶低頗怪春深未歸去  
花下杜鵑應亂啼

伯生約賦竹枝詞因再用韻

君家竹葉江水平我家竹枝三峽聲三峽水隨江上去

回首望鄉終眼明

簇簇青帘蕩子期飄飄紅杏三月時青帘紅杏總輕薄  
自展碧牋書我詞

暮雲纖纖如越羅勸子不去知子何桃花水深放船了  
却憶關山塵土多

愛君酒滑滑如泥白眠叉手頭愈低南鄰琵琶不堪聽  
自舞柘枝驚春啼

舟中得功遠瓊花露戲成三絕

瓊花瑞露十分清客裏相看眼倍明自是江南春色好  
錯教騎馬到京城

平生嗜酒不殢飲最憶停盃微醉時花下盈盈侶相待  
莫教春倒最濃枝

繁禧觀裏花如雪留取清陰待我來應有真真花底坐  
生香一曲舞三臺

梁山樂

梁山水樂八百里容得碧鷗千萬羣愧我扁舟數歸路

晚風掠陣入蒼雲

嫩草豐茸間軟浦一川晴綠映春蕪  
平岡散牧分雲錦簇簇斜陽是畫圖

大船曬網小船罾知是吳儂喚得鷹  
共說五湖難住却朔風吹雨捲千塍

仲章以余賦瓊花露因成陽臺之句次韻

月下看花花氣清羨君不飲更分明  
五雲破曉迴歸馬疑上天邊碧玉城

我愛瓊花賦酒詩雪香憔悴可憐時平山芍藥開如斗  
擬揀肥紅作贈枝

相如肺渴非關酒多病却迴江上來可是春風消不得  
白頭吟憶舊琴臺

送危功遠

翩翩海燕近宮城的的天鵝度上京癡坐江南未歸客  
夜聽春樹滾潮聲

居庸關外雪糝糝騎分明是畫圖猶有深春後歸雁



見君曾宿洞庭湖

天柱峰前第一詞  
風清月冷鶴先知  
京城可是無吟思  
眼看飛花下筆遲

送吳成季五絕

牆東杏樹花千片片  
隨風到馬頭  
只恐花飛不解走  
度關時節暮雲羞

北雪初消未見山  
馱鈴聲雜佩珊珊  
廣家池館春風好  
獨看牡丹惟我閒

上京新酒玉津津薄醉深春惱殺人  
截取當年釣竿竹捲筒相寄不嫌頻

詩瓢淅瀝風前樹雪在深村月在梅  
從此不須生感慨晚寒更上望鄉臺

鰲峰路與僊峰近取次詩筒日往來  
慙愧阿戎松下坐洞門深鎖碧桃開

長沙鄧醫年七十餘遊京師二兒扶小車得酒  
即醉類有道者劉充之號曰壽軒且令賦詩

大兒椎髻小兒了拍手青天在小車剛道人間易榮辱  
醉歸齊插碧桃花

南極星明湘水邊  
七還猶是小行年  
囊中紫粉誰傳得  
酒盡君歸我亦眠

醉面頰如紫玉盤  
天風吹上月團團  
擬翻新譜朝元引  
雪壓梅花鐵笛寒

平原賈氏戲綵堂

鶴髮稜稜水石村  
飛花蛺蝶舞兒孫  
人間朱紫爭先取

落日微茫政倚門

晚訪仲章不遇

小院春濃落照間  
碧簷相對乳禽還  
晚風陣歇游絲盡  
留得歸雲在屋山

梅溪圖

玉人楚楚意逍遙  
隔水攜琴不受招  
回首芳林真嫵媚  
春風歌館聽吹簫

三逕圖

遶舍山青流水新春風吹玉綠勾勾意行已復支筇去  
從此何須問主人

靜芳亭

簾外羣山當畫屏白雲如水度中庭松花落逕無人掃  
失却莓苔一半青

貯香亭

長安何處認飛花片片相隨十萬家唯有碧桃天外種  
露華清淺玉交加

大年宿雁圖

寒雁沙汀睡已成  
雁奴翹首獨深驚  
朝陵閒說燕王事  
恨殺人間兄弟情

次韻馬伯庸應奉絕句一十八首

玄都觀裏桃花句  
沉香亭前芍藥詞  
今年春風侶憐我  
明年春風更相思

肥紅盈盈錦步障  
淺黃深深綠油幕  
絕憐舊嫁小娉婷  
一曲生香淚雙落

垂髻雙雙白馬郎看花不語愁晝長堂前有婦不肯守  
遍愛吳姬與趙娼

綠柳高低千萬樹翠竹橫斜三兩家妾非江南蕩子婦  
不許郎君烏帽斜

五臺山前雪如席千古萬古搖銀光驅馬莫飲澗邊水  
澗水能令馬穿腸

小樓昨夜聽琵琶推手却手怨王家不辭遠嫁盧龍道  
可憐長城骨如沙

海南不愁珠翠少家家共籠秦吉了夜聽吉了侶秦聲  
賈客年年不知老

紅衣夜唱娑羅樹云是西天好兒孫吹螺日飲官法酒  
笑渠騎馬傍人門

吳兒蕩漾楚兒癡酒酣垂手索題詩桃葉不傳渡江曲  
竹枝空歌三峽詞

老鶴攀松舞月色哀猿坐樹啼天光一喜一悲盡今古  
慷慨不如秦舞陽



誰家弄玉矜少年採蓮艇子歌娟娟轉首那知顏色老  
猶抹橫雲啼鏡前

京華作客不知老燈花明滅搖寒房為問涉江下灩澦  
何如種竹滿篋簞

金門羽客恣狡獪清曉玄文總不看朝騎白馬穿閭苑  
夜乘白鶴下天壇

妾顏不比天桃枝妾心不如傾日葵羞著主衣當筵舞  
蓬鬢荆釵却自宜

燕山芍藥大如斗千朵萬朵凝春煙健羨南京馬供奉  
醉著宮袍不上船

向曾六月桓州住雪歇前巖散水樹王郎馬郎太愁生  
兩騎雙雙辭我去

吳門艇子淮南船我慣乘之眼欲穿老來愛酒不得飲  
歸向桃源種秫田

烏靴窄窄稱宮袍雙鬢風翻見二毛聞道中山止十驛  
急須乘馬釀松醪

還馬伯庸文藁

乘槎深夜問支機  
天女流梭舞鳳飛  
回首人間金粟盡  
剪燈愁製五銖衣

逸馬圖

瑤池宴罷周王老  
牛首蛇身騁怪靈  
漢使近從西極返  
龍媒元是世間形

試馬圖

二駿翩翩勢並驅  
轉頭槽檻總庸奴  
秋風萬里雲容與

不用青絲強繫拘

散馬圖

秋盡川原草樹空  
冷雲嗚咽伴呼風  
太平天子橐弓矢  
留得閒身落照中

次韻繼學伯庸上都見寄

陰陰樓殿水雲蒼  
鵲鵲風微夏日長  
渾伴醴泉宮畔境  
千官齊立從文皇

紗縠丹衣珮水蒼  
碧牋裁詔繭絲長  
日斜雙入通明殿

雲母屏前對玉皇

相思盡日鬢毛蒼  
赤土塵深怨路長  
忽憶鏡湖明月夜  
藕花清淺棹餘皇

題危功遠山水

雲作模糊水作稜  
玉峰深鎖鐵崚嶒  
欲問先天觀前路  
釣叟捲蓬終不謬

孔節婦表門

鳳逐麒麟天上飛  
深鍾涼月獨鳴機  
春風猶是人間世

華表亭亭護落暉

墨梅圖

鐵石冰霜百世身  
疎明瘦直一生真  
玄雲借我凌寒便  
直上釣天試早春

雪繭輕蒙絕點塵  
小窗晴日得橫陳  
夢回猶記溪橋路  
黯淡相看喜侶人

蜀女繡牛圖

絕壁連雲翠木稠  
五丁空作蜀王羞  
浣花女子聞鵲苦

繡作春風萬古愁

錢舜舉折枝菊

醉別南山十五秋  
雁聲深恨夕陽樓  
寒香侶寫歸來夢  
背立西風替蝶愁

子昂控馬圖

雪積流沙冰歇巖  
天池飛舞入轂函  
奚官可是相拘檢  
笑領春風白玉銜

渡水羅漢圖

洞口泉分岸渺茫意行的的水中央相看總絕神通想  
不用折蘆歸故鄉

次韻繼學天寶宮禱雨見懷

小著羅衫涼侶秋梨花寒重雪交流瓊林宴罷傳宣急  
不許祠官用虎頭

的的雲團白玉杯可堪羊角雨驟開松花深處塵如雪  
知是龍歸鶴未來

千林紅紫鬪京城一朶姚黃露有聲惆悵可人何處覓



獨行花下到天明

新雨悠揚人未歸  
遠山凝碧綴雲衣  
捲簾擬作庭前舞  
點點團沙柳絮飛

送嶼上人

玉几前峰慘翠顏  
瘦藤挑雪渡三關  
黃塵侶作松花落  
歸雁南來我北還

東南蕭寺梵王音  
禪榻蛛絲薜荔深  
我欲與君同面壁  
首拚雙屐挂松林

東溪老子詩三畧的的英盤貯夜光擬把玉簫松頂坐  
穿雲吹徹九天涼

月映寒燈雪映簷故鄉夢斷酒初忺因思舊宅梅霖後  
新竹齊抽碧玉尖

寄天童岫長老

太白山高雪四圍孤峰翠織五銖衣誰言老子寒無力  
獨擁紅爐更下幃

贈南嶽道士歐陽君

丹鼎芙蓉生玉床  
紫泥封固結玄霜  
道人急歸巖屋守  
不使月明騰夜光

崔白竹

昔年家住篋簾谷  
葉葉凌雲對此同  
近日畫師爭斂手  
垂頭疑在柳陰中

往歲南歸商隱長  
老遠惠佳句不獲承  
貺次韻  
叙懷

席帽京塵廿載強  
風前數髮白於霜  
芸編不檢蛛絲幕

班馬專門萬古香

桑乾嶺上是天心萬樹松花積翠深  
兩度灤陽三伏節片雲飛雪是晴陰

烏紗承笠霏霏土短袖持鞭窄窄風  
冬盡不知梅藥白春來深愧杏花紅

商隱長老以余歸喜溢翰墨愧歎之餘次韻以謝

少年學道惡加鞭掩息支頤絕語言  
玉几老禪曾對坐

茶甌如雪閉寮門

沉沉雲頂絕天風不展袈裟萬念同  
眼見永師傳妙密  
虎丘殘塔夕陽中

龍歸石落無消息碧眼長身振祖傳  
江上白鷗元不礙  
潮回月出滿樓前

春日奉旨侍祠太乙朝罷觀齋中紅梅花

藏春塢裏工夫密一一羣英點絳唇  
共道紫皇分上瑞  
須知太乙露天真

斗柄分明指孟陬紅爐橫簇化工收  
先皇寶厯今重建應許南枝在上頭

次韻砥平石

廿載冰霜興已終復於馬上送年窮  
雙峰閣上憑欄立疑有子規啼晚風

燕山長驛四十五雪擁金臺玉作層  
疑是黃蘗消不得何年投老得依僧

我翁綠野舊精廬樓閣連雲畫不如  
贏得高人歌枕臥

膽瓶水藥樂冬餘

恩師高住湖邊寺  
清夏菱花開錦波  
妙趣通玄鄰  
祭可清言協律近陰何

砥師平地湧金僊  
不說虛空不說禪  
怪我往來增白髮  
雲龍新碾汲清泉

省庵

三十六宮春寂寂  
月華如水碧雲真  
空齋宴坐天心轉  
知是羲皇太古人

姚子中左司墨竹

雪花摇曳被春欺的的琅玕侍玉墀  
千歲玄霜誰拾得  
紫薇花畔寫參差

斗巖

搖光游戲下塵寰曾被山僧駐不還  
從此夜深隨鶴度  
玉衣清淺珮珊珊

歸德王瓊母表閭

寶奩香瑣繡羅衣不許春來蛺蝶飛  
得見慈烏好顏色



門前槐柳引雛歸

西寧李處士碑

元復初作

堂堂吏部睢陽叙耿耿中郎有道碑  
點檢清河金石錄  
的於處士絕諛辭

博平王獻妻徐氏表閭

無子無夫鬢影蓬兩家王母事相同

王逢原妻  
宋史有傳臨川妙

筆傳青史我輩空令兩耳紅

離宮圖

龍首渠開王氣埋淺沙殘草認天街當年金屋寒鴉聚  
時有耕人拾寶釵

子昂逸馬圖

神駿飄飄得自閒天池飛躍下塵寰青絲絡首誰收得  
留與春風十二閑

通叟狀元以秘書滿職言歸泊然若無營者桶舊與  
殿廬詳定得通叟卷氣完以充議者爭緘口今其南  
歸以子昂畫馬求言愴然以別吾徒之責深缺然矣

至治元年八月二十九日稱書

薛濤牋

蜀王宮樹雪初消  
銀管填青點點描  
可是春山留不住  
子規聲斷促歸朝

十樣蠻牋起薛濤  
黃筌禽鳥趙昌桃  
浣花舊事何人記  
萬劫春風燐火高

理皇題馬麟野芳佳木圖

上題丙午歲

重慶城頭翠木圍  
陽羅堡畔野花稀  
卅年竟換人間世

絃管西湖認落暉

丙午至乙亥  
怡州年

題寒拾圖

三人攜手共嘲吟  
古殿修廊自在尋  
石壁忽開靈怪絕  
可禁飛瀑海潮音

舒貴和以黃菊相贈  
賞挹逾六十日  
短句奉還  
深碧齋

九秋風度玉精神的  
的寒英不落塵  
還向清齋調火候  
明年散作萬枝春

雲峰圖

融融洩洩互低昂絕頂瓊冠白玉裳聞道溪南三尺雨  
道人推枕召髯羊

揚節婦傳

鳳簫吹徹碧雲天眼見孤凰淚欲穿回首春風三十載  
槐花如玉柳如綿

宮女賞花圖

一架薔薇錦帳稠滿庭蜂蝶替人愁玉環已侍昭陽殿

側近傳杯得自由

宮女度曲圖

望瀛法曲紫霞觴更按伊州奉玉皇翠竹涼深宮院密  
新聲那得過宮牆

靜中齋

玉宇寥寥星斗沉千林籟寂印天心羲皇猶是人間世  
嶮谷參差不用尋

張氏承祜堂

幼弄青梅共繞牀  
白頭舉按話尊璋  
竹花已老桐花發  
雛鳳參飛列畫堂

題何尊師醉猫

縱橫社穴恣穿窬  
抵掌摩鬚不奈渠  
賴有連錢能遣醉  
晚風殘日卧庭除

題初平起羊圖

舊跨髯羊入帝青  
天瓢如注散清泠  
明知制氣歸吾手  
好與松間護茯苓

題鮮于伯機拱北樓樂府

氣湧如山壓海潮  
高樓明月更吹簫  
從茲徑直虛皇筆  
春蚓秋蛇擅市朝

簡馬伯庸

象榻香濃翠幌春  
美人倦繡態橫陳  
平明欲進朝天襪  
小立蘭燈熨帖頻

山水圖

高閣何人傲獨醒  
蒼松流水倍分明  
絕怜艇子搖山影



猶與行人管送迎

書懷

二紀驅馳鬢已斑  
臨風數雁悟知還  
山中舊種松千樹  
從此歸休手自芟

三月廿九日女孫生朝  
今七歲久客京師未嘗  
食其湯餅舊見林廬齋  
為女孫作絕句事適相  
類瑾子云當次林韻且錄  
林詩于後

福慧曾傳兩足尊  
願將清貴屬高門  
大家女誠夫人筆

付與袁家第一孫

憶昨華光侍至尊  
袖香清曉候金門  
舊留書冊今猶在  
時放漁竿教女孫

隱居放言

憐子憐孫玉雪顏  
更憐諸壻守家山  
若教總使紆青紫  
老盡京師更不還

古道寥寥世不聞  
麥舟高誼薄青雲  
邇來忽作苞苴看  
買得南宮免校文

以琴絃寄永嘉周子敬

五色鸞膠世莫傳  
春雷迸石響流泉  
永嘉七十四居士  
玄鶴來時就榻眠

堯民圖

泰定甲子題

衢尊深酌舞蹁躑  
鼓腹行歌樂自然  
共道帝堯新紹運  
九州重見上元年

育王長老見惠茶瓜次韻奉荅

玉几峰橫寶塔前  
彌天消息是真傳  
蒲團禪板都忘却  
侶笑當時手指天

迸石春芽寶所藏  
枯松手拾許深烹  
能令星斗珠璣綻  
要使江山錦繡張

道人種玉光千頃  
深陋長安畝一金  
只恐冰霜難下齒  
特將妙語助清音

蜀江圖

三峽盤渦艷瀕堆  
層巒百丈鼓聲催  
從今盡向金牛路  
杜宇深啼喚不回

巢溪堂

風攪危巢樹樹秋更騎牛背濯清流舉頭總是人間世  
朝市山林且自由

餘慶堂

閉門春熟酒醪香深夜書聲度北堂不羨崔盧官譜好  
盛栽松竹俟成行

題李士弘墨竹

漫山桃李艷紛紛歲晚相看有此君昨夜墨池新雨過  
淡煙輕掃一窗雲

碧海無塵玉作壺  
琅玕清淺露流珠  
相思忽憶侯都史  
為爾疏封墨大夫

題管道士雷谷

古竇陰陰一線泉  
中有伏龍方晝眠  
何人握固坐其下  
霹靂送雲催上天

盧溝符氏酒亭

茅屋疎煙報午雞  
金沙清淺水亭低  
羲和勸汝一杯酒  
勿與行人東復西

牧羊圖後有閻先生詩次韻感舊因成二首

嬰兒御氣草堤眠能使雙羊合自然  
莊叟不知蝴蝶夢覺來重作養生篇

玉質堂堂地下眠雲龍風虎各加鞭  
松陰靜日趨庭客整佩蘭皋駐集仙

李唐牛

擺耜原空蟋蟀吟秋來乞得自由身  
平蕪又見粼粼綠復與田翁共苦辛

閔思齊調閩府

榕葉陰陰荔子丹  
碧巖深處漱潺湲  
秋聲只在瑤琴上  
曾聽龍吟杳靄間

道山堂上文書靜  
寺寺題詩滿碧蕉  
昨夜海神隨雨過  
綠牋為作小詞招

水僊圖

日暮佳人十二鬟  
臨風解佩意閒閒  
當年曾立通明殿  
笑押蛾眉第一班



百鷺圖

紫宸深處立清班  
聽履雖難得自閒  
歸向江湖尋老伴  
展圖猶在五雲間

絕句

五言

信州招真觀二十八詠

小隱巖

山鬼小兒足木精  
游女神據會學真  
隱下視飛花塵

馨香巖

深睡失明珠猛走飛流涎松花卷輕雨滴滴百重泉

學堂巖

露盤下金薤雲笈流珠纓泠泠寒巖下猶有嬰兒聲

鬼谷巖

縱橫太古石短長千歲藤感彼巖居子獨飲古澗冰

昇僊臺

寥寥入太清金門繚紫垣或云有官府微誦五千言

釣臺

垂綸落澄潭小魚儵然來大魚引之去釣石何崔嵬

一線天

茲山可容天舉世皆笑之我不答此語鼓腹支其頤

五面石

分一只成五五石各有一誰能據其上面面不相失

寒月泉

曉汲寒泉清明月各在岳岳空不見月引水復在手

金沙嶺

金沙雖為貴履之傷我足愧彼側布人欲獲無量福

長生池

飲水人已去山中多白頭青蘋空淺處時見玉蟾游

老人峯

高帽側整整秀嶺深重重積此太古雪遂名老人峯

三山石

三山不可度絕壁峙書堂流水日浩浩太極彌茫茫

磴潭

沉沉無底谷  
央央太古雲  
赤日焦下土  
老蛟眠不聞

玉簾泉

截玉作明簾  
不知簾外事  
應有碧眼僊  
隔簾見人至

石人峰

餐玉未得法  
變形成楚囚  
九轉乞換骨  
三沐期點頭

僊足巖

山深猿犬驚  
瞬息下神步  
空飛本無跡  
長嘯上天去

月巖

顧兔樂嬉遨入地不得騁化為白玉泉彷徨返東井

雷公巖

神釣起空洞陰火生羽翰我耳若不聞白雲在天冠

道人巖

道人本無姓對客如有言龍口迸石髓鳥跡開雲根

丹井

金鼎閤寒泉真火彌不壞年深定飛騰子夜吐光怪

洗藥池

靈根乘月吠肉芝生土肥濯以上源水千歲永不飢

鳳山

孤飛千仞岡兩翼化為石年年春風時山花成五色

風洞

罡風轉空輪浩劫不停息此為天地根視之杳無跡

逍遙巖

形留非自在何者為逍遙青松在谷口白雲在山腰

長廊巖

飛吟起霞珮馭氣躡天梯碧雲布參差纖脩與巖齊

龍口巖

弄月紅玻璃匿雲紫芙蓉近已厭狡獪納息玄虛中

靈湫

靈龜道其前游鯨殿其後歲久深自韜清夜巖下走

朱窩楊柳青地近滄州余愛其名雅作古調五  
首

朱窩楊柳青明日是清明地下不識醉悲歡總人情



朱窩楊柳青客亭塵漫漫為你多離別我生無由完  
朱窩楊柳青黃河瀉如注還俟飛絮時相同入海去  
朱窩楊柳青自愛青青好亦如遠行客相逢不知老  
朱窩楊柳青桃杏鬪顏色顏色雖不同時節各自得

墨蘭

飛瓊散天葩因依空巖側守黑聊自韜不與衆草碧  
僊人紫玉枝化為水蒼佩獨立搖落中秋風得相貸

次韻宿清風軒

游滴正覺寺

天風淨雲衣海眼卷石髮醉起撲殘燈獨看端正月

石湫二水橋

寧為千丈清不作一尺渾古語有涇渭橋水何人分

虛一

欲問鴻荒事何如鰲極時三三與七七在首不須知

題應得茂游吳紀二絕

澗束冰泉咽松懸月露清何人會真趣細坐與君評  
聽鶴駕湖曉呼猿驚嶺昏十年南北恨無語獨銷魂

雲鏡

團團白玉光直入寒奩底  
昭徹誰為容空飛本無趾

霧香

含章楚澤東晚思淒冥冥  
剖之久不食三嗅揚其靈

竹西

前導扶桑日廣招閭闔  
風天心須正位不必問西東

清容居士集卷十三

欽定四庫全書

清客居士集卷十四

元 袁桶 撰

絕句

五言  
雜詩附

六言

雜詩

雙雁圖

秋風限南北何事往來頻並宿寒蕪際應憐自在身

六月二十四日夜夢剡源師同遊山寺主僧延

入丈室出梅花畫卷賦詩旁有胡用章先生

坐主僧下時剡源對席僕居其次案上綠竹  
一枝青翠可愛剡源賦詩掬即援筆

一白不受采重玄今罷論憲前有綠竹密雪打黃昏

漁樵問答圖

翠嶺邀黃鳥蒼波玩白鷗偶因平地坐始識世間愁

新安郡嶺南十詠

清江釣月

神魚竊金液為龍復為光平波無纖雲有餌不肯嘗

空谷耕雲

斜側龜背戲高下魚麗圖阿童踵其後黃犢為前驅

蒼峯卓筆

仰手判虛白昭回爛星斗遂令山下泉復作之玄走

碧巘舒屏

古藤青步障曲曲靜相宜春晚巖花發生絹印折枝

楓林巢鶴

絕頂秋聲急盤旋作我家不須金掌露且服赤城霞

雪澗浮龜

飛湍齧雪根千載見五色中有九九文舉世人不識

峻嶺扶車

前行已可戒後行復何如懷哉王陽生靜言表其閭

圓岡揭斗

晞髮步上帝空巖泣山妖厯厯化為石橋松導前杓

古寺垂虹

飛虹飲長澗垂首不能收僧從背上行水流橋不流



雙溪合璧

鳴玉抱山根上有金蟾翁指揮鐵如意化為雙白龍

子昂蘭竹墨戲

玄霜落銀繭飄飄湘江佩服媚疑褻之碧窓靜相對

二

迸地麟角精摩空鳳毛聳寒泓散晴煤桃李爭色動

題龍虎圖

玉淵發靈籟摩盪超九天調鉛靜召之帖首在我前

二

寒松翳幽篁得意當路隅急以真一水坐令侍瓊琚

墨竹四絕

霽霽凌雲志霜餘節更存春風宜管領生意屬兒孫

右老

奮雷初出地承露已凌烟願從朝元駕為旄拂九天

右嫩

直道犯無隱虛心明且清側身思遠舉巖壑養深情

右風

曉沐換新綠萬采成空塵守黑心不縉同玄道彌真

右雨

墨蘭蕙四絕

金明秋林清月白楚天碧美人眇愁予服媚永今夕

二

采芝不成仙食薇難療飢結茲以為佩臨風酌湘纍

三

天香落銀楮秋聲入玄筆何如湘夫人促軫鼓靈瑟

四

組綬何承承琲珠復累累相視不以色紛披映簾帷

題悟律師語詩卷

萬樹叢雲裏千巖急雪時世塵俱不到端坐誦君詩

二

壞衲翻經帙匡牀點律科看山無限思一一付吟哦

子昂枯木竹石圖

亭亭木上坐楚楚湘夫人因依太古石融液無邊春

六言

厚齋先生以詩借玩辭次韻

項子沈冥學古芸芸萬變觀文閉閣清香宴坐斯人端  
可神交

二

已悟長年坎離更窮逆數先知補亡已滿三篋問事誰  
携一瓶

題湖曲小景

穆陵御題詩句

流水無言寂寂落花有意穆穆往事空餘華屋倚闌愁  
絕江南

送鄧師禹歸龍虎山

小帽飛花一寸輕舟流水三分落日獨歸洞口隔溪短  
笛猶聞

獐猿圖

細草豐茸古洞斜柯厯落寒雲信道乾坤消息端須類

聚同羣

孤雲

在水同源一色出山萬緒千條欲趁驂鸞整整更同笙  
鶴飄飄

二

規矩方圓在手輕清重濁隨形宋子不須苦賦屈生為  
我揚靈

三

白雁似憐片影碧潭深映無心獨上紫霄峯半參差吹  
徹飛吟

題陳文翁畫扇

淡淡孤花欲笑娟娟雙蝶疑愁無奈寒蛩得意竟專落  
日啼秋

題美人圖

西施

辭家已意存越入宮誰解圖吳故苑秋風麋鹿扁舟夜



月江湖

昭君

鬢影愁添塞雪花  
枝羞殺宮春誰道佳人傾國解從絕  
域和親

馮妃

目送亭亭秋水腰  
迴款款春風為問下車搏虎何如御  
坐當熊

班姬

望幸眸凝秋水倚愁眉簇春山已悟篋中紈扇須看鏡裏朱顏

洛妃

可怪夢中說夢底須愁裏添愁落日春風王子多情不解綢繆

綠珠

金谷煙迷清曉玉簫聲恰餘寒可恨花鈿委地當時莫倚危闌

壽陽

一片花飛宮裏十分春  
滿眉端底用流酥點綴更煩圓  
玉搓團

張麗華

結綺塵空樓暗景  
陽春斷鐘遲紅葉無言在手同成井  
上胭脂

次韻潛昭焚香

意絕豈能生慧心  
清定解通神一穗黃雲滿几故將綺

語撩人

二

甲煎烟消吐艷鷓鴣斑湯暖凝脂道人機心已盡清坐唯餐兩梨

三

紙帳溫雲如醉綺樓春夢成虛知見何須盡絕詩成要是禪餘

四

宮樣昔傳心字羅紋指甲爭工往事桃花流水黃塵蔓  
草寒風

潛昭九日贈龍團次韻

月轉舊栽玉勝雲爐溫浴銀芽九日殷勤相贈淡羅猶  
記金花

二

閱世已成清玩傳觀那識餘甘寶篋政須千龍瓷甌未  
許同參

題伯庸所藏子昂竹石

伯夷清宜典禮子路勇成冠軍日落虎驚沒羽潭幽龍

走凌雲

二

胸中丘壑玩世眼底煙雲凜秋岸幘欲澆磊砢解衣深  
聽聽聰

墨竹

蘆葉不禁秋色柳枝那解春聲醉閱小窓橫幅風回雨

轉雲清

子昂墨萱扇為湖南楊晉母作

墨蜨巧分釵股玄蟬高綴冠梁莫厭南州炎溽為漆北  
戶清涼

雪谷曉行圖

過翼淒淒巖谷曠懷納納乾坤我欲想思命駕入猶高  
卧局門

高彥敬遠山木石圖為紀夢符學士作

身比寒厓枯木心似浮雲太虛落日前峯堪隱丹青渺  
渺愁予

復成

黃髮蒼顏並轡白雲青山比肩誰道風流已矣只今圖  
畫依然

春雲出岫

駘蕩巫山態度悠揚洛浦精神春去似歸閨裏月出端  
疑水濱



謝氏梅坡

謝家雁行兄弟一枝偏出南州低昂肯受殘雪瀟灑猶  
堪盛秋

劉生還廣信省親就試

萬馬隨雲北上孤鴻趁暑南飛欲踏三山海浪願隨寸  
草春暉

頤齋

多言不直杯水異味能生五兵何以深深閉息丹臺出

日初清

禮闈倡酬

乙卯

次韻禮部李公二首

明詔傳巖谷相攜入帝京  
心同蛛網織意擬鵠巢營  
選德珪璋器掄材杞梓楹  
龍門能化鯉端不負平生

二

黼坐思文渙號行鵠袍林  
立萃天京釣絲已具六鼇手  
彩筆誰傳五鳳名寶鑑懸空  
深照影神鋒躍冶莫容情

百年禮樂重開運此道何須問兩生

次韻監試李仲因御史四首

高墉護脩庭列仗嚴棘闌昭代聞文治多士舒且遲謬  
言職絨縻晝日深下帷昂昂子大夫咫尺瞻天威願罄  
惓欵忠少奉白玉墀直言諒無隱寧懼菲與羹

二

中朝尊壽俊入徵垂安車念彼巖谷生惠然命來趨鵬  
飛企天池鳳息思高梧煌煌六籍功不與稊稗俱明皇

燭遐邇追琢璫與璵雅詠廣棫樸仁風暢騶虞

三

高堂集羣英搖佩蒼玉寒朗鑑明月高雅量滄海寬上  
承丹宸心舉逸修廢官孺童入闕內芝叟辭商顏陋彼  
馬上翁慨慷空溺冠

四

皎皎鵲抱子旅進翔廣廷明時昭曠典如醉眸初醒稽  
古迺正學敢言但桓榮昌歎詎正味咸池在希聲古云

儒匪迂雍容佐文明餘思續皇雅黼黻歌昇平

次韻郭巖卿

清穆黼坐更化絃儒館集議招列仙玉堂射策興羣賢  
鵠袍賈勇思登先輪囷奏牘誰三千利若武庫森矛鋌  
巍如繩直清廟堦常山之蛇首尾連胸臆結約言不愆  
峩峩相國水鏡懸手捧詔墨金花鮮大為梁柱小枻掾  
令嚴虎士齊烽烟遊絲日靜風翼翾羣曹坐井難觀天  
大鈞橐籥品物甄代天有命司其權錙銖美醜精評詮

方臯相馬遺黃玄嫫母敢作千金妍工輸守度成方圓  
萬目一口非幸然斟酌損益牛無全慶雲五色果愚邊  
彤庭珠貫臚聲聯明堂正席開几筵扶杖觀化嗟華顛  
煌煌龍榜天門前金吾控騎青絲鞭夾道動色爭駢肩  
詩書往昔成遺捐聲教丕合今無偏瓦金之注同一誕  
慎勿逞說窮雕鐫皇元文運齊天年

秋闈倡和

丁巳

次韻席士文御史

至道白璧重小言浮雲輕詞場次後先理致貴坦明捧  
心匪正色偏師乃奇兵駢白袍子昂首爭疾行味道  
絕嫵媚清心養和平謬謬御史公懼我遭譏評當道謝  
駑駘朝陽歌鳳鳴

次韻士文感興

宣尼倦遊躅冥思立天紀洗心悟盈虛應物合參倚羣  
雄爭霸盟騁意立私史崎嶇東周君削弱絕統體約言  
正墜典執筆乃託始後王迭雄長正閏亂朱紫說叻江

海深短長爭四起太羹實鉶鼎玄冕表朱裏返真非無人未派失玄理金壁騰虛空謂是可不死或言影響功駭愕壓餘子齊居玩芸芸作事首存悔洗心探義文變動寔由已神珠守深淵光怪孰可比矯矯林中鶴絮白不受耻紛紛堂下蟻聚羶亦無幾流光企羲娥慎獨守素履之人金石心年運任坎止中年勇聞道晚歲復未已驅車望前川操轂敢濡軌

八月二十有二日范京尹同會秋闈天使傳詔



命溫問試策貢士賜以法酒臣桷等望闕再  
拜以叙飲膳錄官翰林應奉臣翼述其歌詩  
謹用次韻

五雲閭閻祥鸞流紫皇御極圖神洲魏煌京師首文化  
計吏四出巖阿求城南儒宮極蕭爽古木落月凝清秋  
麻衣東西白鵲峙鳥帽高下寒鴉稠朱顏廣額粲胄子  
佩服觴礪懸吳鉤兵奇欲奪趙氏壁氣盛直卧元龍樓  
范侯機深妙彈壓鷄翹蚤歲同宸旒傳宣溫訓慎去取

瓦釜勿以黃金酬宮壺午傳瑞露重翠質縝栗絨封周  
微臣望拜感莫語願上史館書徽猷百年墜典起盛世  
慶雲五色開公侯興文云初道任重滄海浩渺難方舟  
眉山之蘇詎常士過眼獨賞須梅歐夜闌心掉不得語  
瑟縮凍吻歌丕休

次韻王正臣書史試院書事二首

貢士搜天巧經營縹渺間露蟲吟嘖嘖雨葉戰潛潛董  
賈傳醇正揚劉陋險艱銓衡同水鏡辱贈不知還

二

古殿蒼雲裏  
疎星出樹間  
案燈光閃閃  
簷溜滴潛潛  
便覺登瀛易  
誰言與選難  
白頭心更苦  
滄海探珠還

次韻宋質夫應奉秋闈書事二首

廣寒清徹桂花黃  
影落空庭夜露涼  
七札巧穿誰矢直  
大鼇連舉我竿長  
神清難入胥華國  
賦古須看古戰場  
一朶紅雲傳堪露  
夜深齒頰凝天香

二

草廬星列藉寒莎欲擬隆中事若何倚筆看天塵境絕  
袞辭翻海怒濤多特衡要使心常赤題榜誰言髮盡皤  
盛世崇文徧寰宇遺賢寧肯老巖阿

次韻席士文御史六首

煌煌文運起賓興樸學無知謝未能北斗夜橫東壁正  
露檐危坐獨凌兢

二

槐木森森雲影開諸生曳履起輕埃明河可是人間物

端用乘槎八月來

三

文鋒鏖戰白差差  
沉著無聲午漏時  
掣海碧鯨翻古製  
翔雲彩鳳吐芳辭

四

倚筆看天思獨難  
懸庭秦鏡敢藏奸  
東方射策三千牘  
始信明時取士寬

五

多病支離百不堪挑燈眼眩罷清談  
廣寒果有娑羅樹須踏天梯上蔚藍

六

烏府先生玉屑清論文冲淡去浮輕  
要令我輩平如砥不使與言負聖明

秋闈倡和

丙寅江浙

至治三年八月十五日乘驛騎抵榆林于時善  
之祭酒仲國學士伯生伯庸二待制同在驛

舍傷感增悵今忽同校文于江浙因述舊懷  
萬馬穿塵入渺茫遺臣一日九迴腸碧雲碎碎琉璃影  
白月離離菡萏光雁足無書來海島龍髯有恨達衡湘  
誰知此日同文館把手無辭醉十觴

三十年前與倪仲深泛湖作中秋今幸同與校  
文中庭月色如畫短句叙舊

昔年同泛凌風舸白眼論交屈指難楓葉參差山影矗  
藕花凌亂水聲乾我方烏帽穿黃霧君正羊裘漱碧瀾

歸隱始知人世換無端此地更憑闌

中秋東周儀之推官伯明都事兄

氣與西山爽氣高酒酣燈冷各稱豪不隨北雪追燕騎  
徑上南雲踏海鼉桂醕的知侔沆瀣蔗漿端可獻蒲萄  
衰年投綬慙真隱更為君王選俊髦

汪叔濟推官鄭復初判官周本道判官同校文  
江浙因思歐陽兗公王岐公事政相類不可  
無一言以成故事短章述懷



長冠黑髮雁行齊  
謹對彤庭陋木鷄  
直以中聲生玉琯  
更將五采藉玄圭  
文章贍足期穿札  
經術精深鄙印泥  
我輩直須雙目炯  
肯令餘子誚昏迷

次韻假省掾

妙筆翻空歷杳茫  
更馳紫電騁沙場  
珠璣已綴三千牘  
斧藻能成十二章  
易水臺高招國俊  
廣寒路近裛天香  
相君盛德憐驚劣  
給燭分茶與激揚

再次韻

白頭歸隱髮荒荒那識當年古戰場  
文雉朝陽金吐綬潛虬迸霧火為章  
才超董賈文如織語壓淵雲墨有香  
會見彤庭冠多士始知我輩陋宣揚

輓詩

謝尚書

學易書臺地

資州有李鼎祚讀書臺謝公治易

詞林起壯猷家空辭蜀

道祿薄度南州

曾知封州復為廣東倉曹

愛石雲生坐看書月過樓

淒涼甬水曲風竹自蕭颼

二

晚歲功名異蒲輪禮數溫嘉謀傳竹帛肥遯寄丘園散

號南儒貴

自號為教  
賜南儒

峩冠北客尊冥冥乘鶴去空想典

型存

史觀文

奕世調元貴南東第一家紫綸傳密札綠髮擁高牙往  
事霜前木餘齡霧裡花陽明真洞啟跨鶴整飛霞

二

故國衣冠聚凋零獨此賢勞生樂蟬蛻遺魄寄牛眠丹  
旒前官貴青箱舊物全哀榮今莫比笳鼓聞晴川

李宣慰

思衍

宏才卓犖羣雌悵望心期晚歲違江海夜長談舌壯  
關山春斷客魂飛批風給月文空在逐電追雲事竟非  
神理綿綿那得盡冢頭新拓翠成圍

二

白首功名汗漫休一官鍛翮玩清秋終憐苒惹難消瘴

肯用蒲萄強博州萬事浮雲今已定百年公論與誰謀  
羊生未洒西門泪落日寒江水亂流

史猷文

少小昂昂意長冠脫綺襦交遊金谷聚談笑玉山扶舊  
雨三槐宅西風五柳湖空令後生輩彈鋏陋為儒

二

妙語千年簡英姿百世期忍聞淮水絕不見雍門悲往  
事雲歸壑空言水覆卮相從今已矣寒泪滴水澌

王尚書

秋水雙蓮孕英英吐異分詞章納雲夢禮樂訂河汾丹  
詔三軍泣清名四海聞西風傾落日乘鶴叩蒼雲

二

晚歲艱難意衡門老病身蜀山迷望帝楚澤痛靈均皮  
弁終辭徵深衣晚任真蓋棺今已定千載有遺民

三

燕說經生濫齊諧學究輕微言空有意獨拍已無聲墨

澤鷄林貴青龜虎觀榮新銘前進士幽抱付誰明

四

再世登龍舊淵源許管窺西山遺正緒東澗結冥知腹  
笥名空在眉梨壽竟違重歌妾薄命寒泪滴塵甌

楊夫人

丹桂香殘紫菊薦轉頭何自失芳年錦裙舊綉空為記  
玉軫新聲已莫傳散騎文成殘月泪彩箋書罷白雲仙  
人間總有相思恨不用松風激澗泉

潘少白

星厯張平子丹砂葛稚川書田終晚歲酒國送長年世  
味雲行水心期月印天諸郎聞競爽蒼碣定重鐫

史湖州夫人

清白吳興守稜稜老吏師風霜塚上木玉雪閭中儀種  
德桑千本傳家挂一枝春暉有餘報遺範合蒼碑

文集賢

家聲垂宇宙更作列仙儒表粲那無傳嵇康已不孤金



鷄官驛暝白鷺古洲蕪不盡修文意端從地下圖

其二

死者不可作家兒常自嫌奉輿薊門角叱馭越山尖猿  
落三更汨霜飛六月炎人方愛嵇紹我亦愧陶潛

三

前朝三百載慷慨盡斯人天地有消息江湖多賤貧許  
人憐老母叱馭作忠臣邂逅成丘首猿啼似有神

黃夫人

錦堂鶴髮玉稜層猶是承平舊典刑  
鸞詔日邊傳御札  
絨鞍花外候仙駟  
室如明鏡心如水  
庭有斑衣案有經  
回首人間真蜨夢  
澗松搖佩起泠泠

悼章斯遠

學道求仙二十年  
飲冰齧雪竟蒼然  
錦機斷幅朝元賜  
銀燭殘膏醮斗傳  
役鬼有靈符絕筆  
燒金無術鼎飛鉛  
昨宵同我堦前飲  
今日憐君地下眠

烏府先生聲似鐘  
希年噩夢喜溶溶  
擬看廣領傳青簡  
誰信方瞳學赤松  
秋月白于銀鑿落  
夕陽紅似錦芙蓉  
燕山角水五千里  
從此空飛減去蹤

悼張道士

海上神仙十二鬟  
思君疑在有無間  
桃花褪水青春急  
柳絮團風白日閒  
芸室燈昏螢閃閃  
藥壇雨冷竹斑斑  
他生欲了重玄事  
煩乞神膏駐好顏

吳君載

金谿人

妙年玉雪佩幽蘭塵尾英賢接往還萬里出門車折軸  
九天無路虎當關青燈黃卷家仍在古木清溪福竟慳  
賴有韓公三世舊已將椽筆誌瑤環

夏昭文

晚歲心清眼界平看雲沒憤養修名徒憐化鶴悲滄海  
不見迴鸞下玉京觀物無心玄草滿愛吟有句墨花輕  
蒼山日落簫聲急似有仙家白鹿迎

熊處士

三閭千古恨五柳一生賢石護栽花徑泉分種秫田松  
高青耿耿竹淨綠娟娟欲識淒涼意埋名手自填

危功遠道士

紅日翳黃埃騎鯨徹九垓詩瓢風厯厯丹鼎雪皚皚紫  
府調仙掌朱宮育聖胎相期千古意獨立重徘徊

劉古昂教授

矯矯南鵬翼昂昂野鶴姿剪燈千古事彈鋏半生詩棋  
罷黃梁熟歌殘玉樹萎溽雲催雨急相送不勝悲

成都何德三處士

蒲應奉其弟子也晚居興元

江漢清秋老岷峨故國身潛川珠玕璦韞匱玉孚尹逸  
興蟬離垢癯容鶴寫神發硯經席正炙輶辯鋒新素業  
詩千簾幽居黍一困非辭魯生激自樂管寧淳水近蘋  
交佩巖低溜墊巾詩清猿母泣詞整燕雛親夢往蕉疑  
鹿書成筆感麟山觀天外象梅閑靜中春燐墨魂猶慘  
槐黃事可詢極知情惘惘徒意走趨趨舊里傳遺藁空  
堂象素真故人調鼎鴈弟子演絲綸靖節名堪重文中

躅可循悠然端有意念此竟誰陳

吳饒公

種德槐三樹傳清桂一枝晚年香款款天爵歲熙熙大  
賚開茅社殊恩辦土宜執謙容受谷詠道樂沿沂玉帶  
朝元服朱顏浴日姿菊泉便上壽橘井養清資引竹藤  
侵履看花柳拂卮跨鞍人共仰扶杖客爭疑霜暖柑分  
釀年豐黍作糜黃封浮瑞露白醉擁晴曦京國輸甘旨  
鄉閭表羽儀齊年堂上扁通德里間楣可謂疇離祉胡

然不慙遺烏傷情有感蟬蛻樂無涯孝養傾千古褒榮  
盛一時誰成太史傳會俟侍臣碑

王秋山

翩翩玉雪養修名絕頂穿松午日青別墅忽迴迎客犬  
空林猶隱讀書螢苔荒琴薦春無迹風攪詩瓢樹有靈  
萬疊蒼雲埋玉去好將銀管寫沉冥

廬陵李主簿

青山暗淡畫圖中雁塔塵深進士空可恨餘勛收汗馬



極知往事費雕蟲暮年榮辱非吾意此道升沉屬至公  
松竹蕭蕭自今古清秋裁此託冥鴻

趙令入

永陽郡王  
與某女

靈漢雲昏彩鳳沉參差聲絕露沾巾高堂玉樹竟芳殞  
寶篋金花空素陳鮫室不知珠滴泪仙壇曾見海揚塵  
百年精爽真冥會一掬清溪是劍津

吳夫人

上饒徐覺  
民主簿母

玉樹雕殘浩劫還稜稜鶴髮獨清全種桑不作十年計

指廩能生萬灶烟白壁養成玄圃失華堂歌罷板輿懸  
坡陂積翠松千本準擬飛雲歸墓田

黃如山

兵後還家意苦辛白雲落落泪沾巾松花麪麥厨常淨  
貝葉書經筆有神蝸角可憐蠻氏國鵲聲猶記蜀王身  
白頭編簡成春夢的的餘勛付後人

劉伯宣中丞死三十年延祐丁巳歲始得諡忠

憲朝中各為挽詩

烏臺雲黯栢蕭蕭秋雨聲悲廿四橋置獄可能生長倩  
入門端不祭臯陶墓前飛鳥傳新象身後騎鯨下大招  
聖代昭明青史著願將直筆紀奸妖

東平段衡率

壯歲投鞭夜度江前茅親授百城降後軍長物惟書篋  
別墅閒情獨酒缸燕憶香銷塵滿榻鶴驚琴冷月當窓  
傳家舊有贏金諺手種堦前壁一雙

何德三處士

雪色鬚眉兩臉春市中能作笑雲人簪花欲舞鳥啼急  
放鶴初迴蜨夢真茶灶烟收門掩畫詩瓢風動筆生塵  
婷婷小女思翁醉欲剪巾紗泪滿唇

家賣烏紗染入得  
宜士夫咸取之

播州宣撫楊資德

掌武傳無敵崇儀續上多精思書竹帛英譽蓋山河絕  
北驚遠海投南鎮太和襲封綢滿篋錫誥錦成窠皎皎  
明玕樹亭亭碧玉柯之無文綵認宮羽短襦哦魏帝奇  
何並唐家悅李過幼成端有種帝鑒的無頗玉帳龍韜秘

青箱鳳篆摩教民風偃草撫俗水旋渦斥境嚴銅柱征  
戎指鉞戈雅遊春結佩小隊曉鳴珂士飽歌于為軍懽  
酌叵羅追亡窮古澗濟勝極幽蘿寸地歸王化羣蠻守  
治科細氊倖密纊善馬敵名駝客有依劉憾人傳嗣產  
歌氣融汶嶺雪量納蜀江波葛相功猶在韋王事若何  
雲仍賢莫比君長禮無苛閉戶時披褐看山暫脫鞵填  
詞鶯囀切促軫雁聲搓芝嶺圖空想桃源境類訛盛年  
真國器妙質竟山阿世德蟬聯備家聲驥子戢播川彌

震耀峴石詎沉磨

真定史萬戶

高陽之徒也至死忽題詩而逝

一身蠶作繭兩曜蟻旋磨投筆人境忘長嘯泉下卧

二

月流白羽觴風送朱絲絃欲識無生樂熟睡三千年

三

玉雪陽春五十年詩成書罷珮翩躚擬將北斗為嬰缶  
不向人間酌酒泉

臨江熊君

浮湛原不礙清影  
透溪扉木落行雲泣  
山空病鶴飛  
詩書誰素業  
江海獨天機  
此意何人會  
哀笳慘暮暉

至治丞相輓詩次韻李仲因學士

重玄開葆命  
上聖席蘿圖  
盛德涵諸夏  
深仁決八區  
降靈申作翰  
稽古禹陳謨  
初日行黃道  
羣星拱紫樞  
神羊庭辨直  
貪獸鼎垂模  
纁帛招賢俊  
銅金辟佞諛  
撫床論密勿  
借筋契都俞  
明月青銅鏡  
中秋白玉壺  
律成懸象

魏禮缺補鴻都士進三千牘奸誅十二衢彌縫前後正  
損益古今殊相業傳喬梓英標瑞竹梧痴墓元有兔猛  
虎果非羆內坐占華蓋中階仰泰符令嚴顙白帝漏下  
候黃姑萬騎玄雲蔽羣狐黑夜呼銜枚兇有約解帶僕  
云痛象燬端因齒龍眠竟失珠聞驚燧人氏事異夏區  
夫闌戟交馳驛重弓競接途殺青誰執簡泣血漫成湖  
史記羹臬賜經簿齒馬誅陰氛動天地遺痛感樵蘇故  
壘烟攢棘荒原燐積蕪邦刑窮剝絕陽澤起萎枯趙氏



兒猶在山公女不孤勲名昭令甲精爽與天徒帝所隨  
升降神仙辨有無

雜詩

破衣僧

撞花楮絲泉纂新乃成敝鐵裈及肉身剛柔亦摧毀真  
空掃真壞大願開大智渴欲飲清泉飢欲思美味隨彼  
所願心以解嗔惱累王侯與長者糞土金玉貴何以慰  
彼思長壽則歡喜壽本同我衣仰箭勢還墜堅忍莫精

進設衣以自譬懼彼不信我投焰五采異老僧機已寂  
贊嘆非本意意絕道始彰從此斷三世

熾盛光佛偈

寶光生虛空旋如火車輪肉眼一見之欣怖難思議謂  
光由身生我身與汝同口眼鼻舌心光亦何曾出無生  
亦無滅是由定慧成衆生受五濁七曜日鑒臨四餘在  
虛空摩盪不暫停列宿值四方好樂各有職或爭彼貪  
嗔或增彼淫慾居處各侈靡恣飽窮膏脂天神與魔鬼

行住陰伺察爰假躔次環俾女作疾忒佛言彼有罪須  
當盡懺悔若更攘割之安得名慈悲矧此缺陷世植果  
會有因罪既從是消福亦從是增般若無損益萬念隨  
積却還彼清淨根衆生永安樂

綠陰堂山偈十首奉寄開元斲江長老

綠陰堂前碧樹齊千枝萬枝雲淒淒生靈不令鷓鴣舞  
禪板時許倉庚啼

二

綠陰堂前春筍生大着錦棚小織成老禪一一點頭角  
要使參天來鳳鳴

三

綠陰堂前初涼夏芭蕉為扇椒為漿日汲井華三百斛  
側聽漁父歌滄浪

四

綠陰堂前古佛身劫火不壞金色新笑殺丹霞斷知見  
暖得病軀生障塵

五

綠陰堂前萬境空  
掩息不語超鴻濛  
有人立雪問大意  
山神泣走號寒松

六

綠陰堂前自在時  
不拈公案不題詩  
僧來住夏與竹杖  
客去逢春贈柳枝

七

綠陰堂前秋葉凋  
湖翻白浪魚龍驕  
我有鐵鉢水一勺

彈脂送爾歸扶搖

八

綠陰堂前夏木清  
千紅掃盡雪層層  
有僧忽問栢樹子  
斫却栢枝僧始磨

九


綠陰堂前結小參  
以手直指車始南  
現前虛空付火梵  
過去功德歸瞿曇

十

綠陰堂前合自然不學吟詩不學禪  
應許清客老居士睡盡高春猶愛眠

還源菴

沃焦山水歸東端與銀河一點通  
誰信道人能掩息手提渾沌擲虛空



清容居士集卷十四